

四庫全書

史部

欽定四庫全書

史部

欽定續通志卷三十四

主事臣尹壯圖覆勘

總校官原任侍講臣王燕緒

欽定四庫全書

欽定續通志卷三十四

宋紀

高宗

高宗皇帝諱構字德基徽宗第九子也母曰顯仁皇后  
韋氏初授定武軍節度使檢校太尉封蜀國公旋封廣  
平郡王又進封康王靖康元年正月金人逼京師軍于  
城西北遣使入城邀親王宰臣議和帝慷慨請行欽宗

命少宰張邦昌為計議使與帝俱如金軍金帥沃哩布留之不遣會姚平仲夜襲金營金帥召諸使者詰以違誓用兵之故邦昌恐懼涕泣帝不為動沃哩布異之請更以他王為質已而欽宗命肅王樞為質于金且許割三鎮地帝始得還金兵退欽宗復遣給事中王雲使金以租賦贖三鎮地又以蠟書結遼降將耶律伊都為金人所得八月金帥納罕復引兵深入破太原沃哩布破真定王雲自京還言金人須帝至乃議和十一

月欽宗復使帝如河北奉袞冕玉輅尊金主為伯上尊號十八字帝被命即發以門下侍郎耿南仲主和議請與俱乃以其子中書舍人延禧為叅議官偕行帝至磁州守臣宗澤請曰肅王一去不返今彼又詭詞以致大王其意可知且兵已迫復去何益請留磁勿行而磁人以雲將挾帝入金遂執雲殺之時納罕沃哩布已率兵渡河相繼圍京師游兵日至磁州城下蹤迹帝所在知相州汪伯彥以蠟書請帝還相州帝遂如相州閏月

耿南仲馳至相州以面受欽宗旨諭帝令盡起河北兵入衛帝乃同南仲募兵勤王初朝廷聞金兵渡河議拜帝為元帥至是殿中侍御史胡唐老復申其議欽宗乃遣閤門祗候秦仔持蠟詔至相州拜帝為河北兵馬大元帥知中山府陳亨伯為元帥汪伯彥宗澤副之十二月壬戌朔帝開大元帥府下令諸郡守與諸將議引兵渡河乙亥帝發相州丁丑次大名府宗澤以二千人先諸軍至會得蠟詔以金人方議和令駐兵近甸毋輕動

伯彥南仲請移軍東平帝遂遣澤以萬人進屯澶淵自是澤不復預府中謀議

建炎元年春正月癸巳帝至東平初京城被圍久中外莫知帝處及是金人謂帝在澶淵遣甲士及中書舍人張徽來召帝宗澤命壯士射之徽乃遁伯彥等請帝如濟州二月癸未次濟州時帥府官軍及羣盜來歸者號百萬人分屯濟濮諸州而諸路勤王兵不得進三月丁酉帝聞金人已留二帝于軍中而立張邦昌為帝乃承

制以宗澤為徽猷閣待制戊午以汪伯彥為顯謨閣待制充元帥黃潛善為徽猷閣待制充副元帥夏四月二帝北遷癸亥邦昌尊元祐皇后為宋太后遣人至濟州訪帝上書自言從權濟事及將避位之意帝復書與之而諭宗澤等以邦昌已受偽命義當誅討然慮事出權宜未可輕動澤復書謂邦昌篡亂蹤跡已無可疑宜早正天位興復社稷門下侍郎呂好問亦以蠟書來言帝不自立恐有不當立而立者丁卯張邦昌遣吏部尚書謝克



家以大宋受命之寶至濟州帝慟哭受命遂趣應天是  
夕邦昌手書上延福宮太后尊號曰元祐皇后入居禁  
中以尚書左丞馮澥為奉迎使后遣兄子衛尉少卿孟  
忠厚持手書遺帝俾帝嗣統后權垂簾聽政邦昌權尚  
書左僕射丁丑馮澥等至濟州百官三上表勸進帝乃  
權聽國事戊寅命宗澤勒兵分駐長垣韋城等縣以備  
非常東道副總管朱勝非至濟州宣撫司統制官韓世  
忠鄭延副總管劉光世西道都總管王襄各以兵來會

癸未帝至應天府皇后詔有司備法駕儀仗乙酉張邦  
昌至伏地請死帝慰撫之五月庚寅朔帝登壇受命禮  
畢慟哭遙謝二帝即位于應天府治改元建炎大赦常  
赦所不原者咸赦除之命西京留守司修奉祖宗陵寢  
罷天下神霄宮及散青苗錢應死節及歿于王事者並  
推恩奉使未還者祿其家一年臣僚因亂去官者限一  
月還任蠲在官欠負南京及元帥府常駐軍州縣夏稅  
應募兵勤王人以兵付州縣主兵官聽赴行在中外臣

庶直言民間疾苦雖詆訐亦不加罪命官犯罪更不取  
特旨裁斷蔡京童貫朱勔李彥孟昌齡梁師成譚稹及  
其子孫更不收叙内外大臣限十日各舉布衣有材畧  
者一人餘如故事以黃潛善為中書侍郎汪伯彥同知  
樞密院事是日元祐皇后在東京徹簾辛卯尊元祐皇  
后為元祐太后壬辰以張邦昌為太保奉國軍節度使  
同安郡王五日一赴都堂叅決大事以河東北宣撫使  
范訥為京城留守癸巳遙尊帝母韋賢妃為宣和皇后

遙立嘉國夫人邢氏為皇后耿南仲罷甲午以李綱為  
尚書右僕射兼中書侍郎趣赴行在楊惟忠為建武軍  
節度使主管殿前司公事乙未馮澥罷以兵部尚書呂  
好問為尚書右丞命中軍統制馬忠後軍統制張渙率  
兵趣河間府追襲金人丙申以呂好問兼門下侍郎丁  
酉以黃潛善兼御營使汪伯彥副之真定府路副總管  
王淵為都統制鄺延路副總管劉光世提舉一行事務  
戊午以資政殿學士路允迪為京城撫諭使龍圖閣學

士耿延禧副之己亥詔太學生陳東赴行在李綱至江寧誅叛卒周德等庚子詔以靖康大臣主和誤國責李邦彥為建寧軍節度副使潯州安置徙吳敏柳州蔡懋英州李柎宇文虛中鄭望之李鄴皆以使金請割地並廣南諸州安置丙午以誣謗宣仁聖烈皇后追貶蔡確蔡卞邢恕蔡懋官以保靜軍節度使姚古知河南府金人破河中府權府事郝仲連死之丁未徽宗至燕山府張叔夜死之庚戌以宗澤為龍圖閣學士知襄陽府丁

已詔成都京兆襄陽荆南江寧府鄧揚二州並儲糧修城以備巡幸遥授簽書樞密院事張叔夜為觀文殿大學士醴泉觀使戊午右諫議大夫范宗尹罷遣太常少卿周望使河北軍前通問二帝西道總管王襄北道總管趙野坐勤王稽緩責襄永州野邵州安置六月己未朔李綱入見以徽猷閣直學士徐秉哲為大金通問使秉哲辭庚申封靖康軍節度使仲湜為嗣濮王御史中丞顏岐罷徐秉哲責官梅州安置癸亥以黃潛善為門

下侍郎兼權中書侍郎貶張邦昌為招化軍節度副使  
潭州安置及受偽命臣僚王時雍吳玠莫儔李擢孫覲  
並遠州安置顏博文王紹以下論罪有差甲子以李綱  
兼御營使乙丑以龍神衛四廂都指揮使馬忠為河北  
經制使措置民兵辛未大赦籍天下神霄宮錢穀充經  
費還元祐黨籍及上書人恩數戊寅以汪伯彥知樞密  
院事遣宣義郎傅雱使河東軍前通問二帝已卯置沿  
河沿淮沿江帥府十有九要郡三十九次要郡三十八

東京留守范訥落節鉞淄州居住庚辰以二帝未還禁  
州縣用樂壬午以戶部尚書張慤同知樞密院事兼提  
舉措置戶部財用癸未呂好問罷乙酉以宗澤為東京  
留守杜充為北京留守罷監司州郡職田丙戌詔陝西  
河北京東西路募兵更番入衛行在命京東西路造戰  
車丁亥以張所為河北西路招撫使括買官民馬勸出  
財助國戊子以錢蓋為陝西經制使封趙懷恩為安化  
郡王因召五路兵赴行在秋七月己丑以樞密副都承



旨王瓊為河東經制使庚寅詔王淵劉光世統制官張  
俊喬仲福韓世忠分討陳州軍賊杜用京東賊李昱及  
黎驛魚臺潰兵皆平之辛卯籍東南諸州神霄宮及贍  
學錢助國用乙未以溫州觀察使范瓊為定武軍承宣  
使御營司同都統制戊戌欽宗至燕山府以忻州觀察  
使張渙為河北制置使東都宣武卒杜林謀據成都叛  
伏誅辛丑復議吳玠莫儔等十一人罪並廣南江湖諸  
州安置餘遞貶有差壬寅詔奉元祐太后如東南六宮

及衛士家屬從行朕當獨留中原與金人決戰以延康  
殿學士許翰為尚書右丞甲辰斬右諫議大夫宋齊愈  
丙午詔定議巡幸南陽以觀文殿學士范致虛知鄧州  
修城池繕宮室輸錢穀以實之丁未遣官詣京師迎奉  
太廟神主赴行在己酉罷四道都總管以尚書虞部員  
外郎張浚為殿中侍御史庚戌徵諸道兵期八日會行  
在丙辰徽宗自燕山密遣閤門宣贊舍人曹勛以手書  
至是月關中賊史斌犯興州僭號稱帝八月戊午勝捷

軍校陳通作亂于杭州己未元祐太后發京師庚申以  
劉光世為奉國軍節度使壬戌以李綱為尚書左僕射  
兼門下侍郎黃潛善為右僕射兼中書侍郎張愬兼御  
營副使癸亥命御營使副大閱五軍庚午更號元祐太  
后為隆祐太后辛未罷傅亮經制副使召赴行在壬申  
命御營統制辛道宗討陳通癸酉以耿南仲主和誤國  
南雄州安置乙亥李綱罷丙子隆祐太后發南京命侍  
衛馬軍都指揮使郭仲荀護衛如江寧兼節制江淮荆

浙閩廣諸州制置東南盜賊丁丑以龍圖閣直學士錢伯言知杭州節制兩浙淮東將兵及福建槍杖手討陳通壬午殺上書太學生陳東崇仁布衣歐陽澈乙酉遣兵部員外郎江端友等撫諭閩浙湖廣江淮京東西諸路及體訪官吏貪廉軍民利病許翰罷丁亥博州卒宮儀作亂犯萊州九月己丑建州軍校張員等作亂范瓊捕斬李孝忠于復州壬辰以金人攻河陽汜水軍詔擇日巡幸淮甸命淮浙沿海諸州增修城壁招訓民兵以備

海道甲午命揚州守臣呂頤浩繕修城池宗澤往河北  
視師是夜辛道宗兵潰于嘉興縣丁酉詔荆襄闕陝江  
淮皆備巡幸戊戌罷買馬己亥以子塼為檢校少保集  
慶軍節度使封魏國公壬寅遣徽猷閣待制孟忠厚迎  
奉太廟神主赴揚州以直秘閣王圭為招撫判官代張  
所責所廣南安置乙巳宗澤表請車駕還闕戊申河北  
招撫司都統制王彥渡河擊金人破之復新興縣己酉  
叛卒趙萬入常州罷諸路經制招撫使壬子賜張邦昌

死誅王時雍癸丑詔有敢妄議惑衆沮巡幸者許告而  
罪之不告者斬乙卯王彥及金人戰敗績趙萬陷鎮江  
府是秋金人分兵破中山慶源府保莫邢洺冀磁絳相  
等州冬十月丁巳帝如淮甸戊午太后至揚州己未罷  
諸路勸誘獻納錢物庚申罷諸路召募潰兵忠義等人  
及寄居官擅集勤王兵者癸亥募羣盜能併滅賊衆者  
官之甲子落李綱觀文殿大學士知秀州兼權浙西提  
點刑獄趙叔近入杭州招撫陳通乙丑罷帥府要郡次

要郡及新軍水軍丁卯以王淵為杭州制置盜賊使巳  
卯次楚州寶應縣後軍將孫琦等作亂庚辰命劉光世  
討鎮江叛卒辛巳以光世為滁和濠州江寧府界招捉  
盜賊制置使御營統制官苗傅為使司都統制癸未至  
揚州禁內侍統兵官相見丙戌趙萬等伏誅十一月戊  
子責李綱鄂州居住真定叛卒張遇入池州壬辰以王  
倫等為金國通問使乙未以張慤為尚書左丞工部尚  
書顏岐同知樞密院事丙申曲赦應天府毫宿揚泗楚

州高郵軍丙午以張慤為中書侍郎戊申以顏岐為尚  
書左丞兼權門下侍郎御史中丞許景衡為右丞刑部  
尚書郭三益同知樞密院事權密州趙野棄城遁軍校  
杜彥追殺之金人破河間府是月叛卒丁進圍壽春府  
守臣康允之拒却之十二月辛酉王淵入杭州陳通伏  
誅壬戌青州敗將王定作亂殺帥臣曾孝序癸亥納罕  
攻汜水關西京留守孫昭遠遣將拒之戰歿昭遠引兵  
南遁丙寅張遇犯江州戊辰金人攻棣州守臣姜綱之拒



却之甲戌金人破同州守臣鄭驥死之張遇犯黃州已  
卯金人破汝州入西京庚辰破華州辛巳破潼關河東  
經制使王瓊自同州引兵遁入蜀丁進詣宗澤降

二年春正月丙戌朔帝在揚州丁亥錄兩河流亡吏士  
給流民官田牛種戊子金人破鄧州安撫劉汲死之辛  
卯置行在權貨務壬辰金人攻東京宗澤擊卻之乙未  
金人破永興軍前河東經制副使傅亮降之經畧使唐  
重副總管楊宗閔提舉軍馬陳迪轉運副使桑景詢判

官曾謂提點刑獄郭忠孝經畧司主管機宜文字王尚  
及其子建中死之東平府兵馬鈐轄孔彥舟叛渡淮犯  
黃州丙申金人破均州丁酉破房州己亥張遇焚真州  
庚子遣主客員外郎謝亮為陝西撫諭使兼宣諭使持  
詔賜夏國張遇陷鎮江府辛丑金人破鄭州通判趙伯  
振死之癸卯金人破濰州又破青州尋棄去己酉禁諸  
將引潰兵入蜀庚戌遣考功員外郎傅雱為淮東京東  
西撫諭使辛亥王淵招張遇降之金人焚鄧州是月以

中奉大夫劉豫知濟南府金人破潁昌府守臣孫默死  
之經制司僚屬王擇仁復永興軍金人破秦州經畧使  
李復降之又攻熙河經畧使張深與戰于新店敗之二  
月丙辰金人再攻東京宗澤遣統制閻中立等拒之中  
立戰死戊午移耿南仲于臨江軍金人破唐州癸亥罷  
市易務甲子金人攻滑州宗澤遣張撟救之戰死乙丑  
澤遣判官范世延等表請還京河北賊楊進等詣澤降  
壬申赦福州叛卒張員等癸酉金人破蔡州丙子克淮

寧府守臣向子韶死之丁丑遣王貺等充金國軍前通  
問使戊寅責降知鎮江府趙子崧為單州團練副使南  
雄州安置庚申以王淵為嚮德軍節度使辛巳和州防  
禦使馬擴奔真定五馬山聚兵得皇弟信王榛于民間  
奉之總制諸砦三月辛卯金人克中山府壬辰詔諸路  
安撫使許便宜節制官吏丁酉納罕焚西京去庚子河  
南統制官翟進復西京宗澤奏進為京西北路安撫制  
置使己酉張員等復作亂本路提點刑獄李芑討捕之

辛亥以范瓌權同主管侍衛步軍司公事屯真州是月  
金人克鳳翔府又攻涇原經畧使曲端擊敗之石壕尉  
李彥仙復陝州夏四月戊午禁州縣責鄰保代輸逃戶  
稅役宗澤復滑州乙丑翟進以兵襲金帥烏舍于河南  
敗績其子亮死之進及御營統制韓世忠京城都巡檢  
使丁進等又敗于文家寺隴右都護張巖及金人戰于  
五里坡敗績死之丁卯金人入洛州壬辰叛卒孫琦焚  
隨州癸未入唐州信王榛遣馬擴來奏事是月以榛為

河外兵馬都元帥擴為元帥府馬步軍都總管五月乙酉許景衡罷孫琦犯德安府戊子以翰林學士朱勝非為尚書右丞甲午曲赦河北陝西京東路福建轉運判官謝如意執張員等誅之丙申復命宇文虛中為資政殿大學士充金國祈請使賊靳賽寇光山縣癸卯張慤薨甲辰金帥羅索破絳州己酉秀州卒徐明等作亂執守臣朱芾迎前守趙叔近復領州事命御營中軍統制張俊討之癸丑罷借諸路職田六月癸亥建州卒葉濃

等作亂寇福州甲子慮囚乙丑張俊至秀州殺趙叔近  
執徐明斬之甲戌葉濃陷福州是月以知延安府王庶  
節制陝西六路軍馬涇原經畧使曲端為節制司都統  
制永興軍經畧使郭瑛逐王擇仁擇仁奔興元秋七月  
甲申葉濃入寧德縣復還建州命張俊同兩浙提點刑  
獄趙哲率兵討之丙戌宗澤薨丁亥詔百官坐蔡京王  
黼擬授而廢者許自新復用乙未以郭仲荀為京城副  
留守甲辰以降授北京留守杜克復樞密直學士為開

封尹東京留守八月河北京東捉殺使李成叛辛巳犯  
宿州九月甲申丁進叛復寇淮西癸巳金人破冀州將  
官李政死之甲午金人再攻永興軍經畧使郭瑱棄城  
遁辛丑陝西節制司兵官賀師範及金人戰于八公原  
敗績死之丙午復所滅京官奉丁未東京留守統制官  
薛廣及金人戰于相州死之巳酉郭三益薨是秋金將  
特哩袞達蘭破五馬山砦信王榛不知所終馬擴軍敗  
于北京之清平冬十月戊午遣劉光世討李成壬戌禁



江浙開羅發亥納罕圍濮州遣韓世忠范瓊及馬擴分  
道援之甲子命孟忠厚奉隆祐太后如杭州楊進復叛  
攻汝洛命翟進擊之戰于鳴臯山進敗死之是月劉正  
彥擊丁進降之十一月辛巳提舉嵩山崇福宮李綱責  
授單州團練副使萬安軍安置劉光世及李成戰于新  
息縣成敗走金人圍陝州守臣李彥仙拒卻之壬辰金  
人破延安府權知府劉選總管馬忠遁通判府事魏彥  
明死之癸巳趙哲大破葉濃于建州濃請降復謀為變

張俊擒斬之乙未金人破濮州又破開德府守臣王棣死之以魏行可充金國軍前通問使庚子詣壽寧寺朝饗祖宗神主壬寅祀昊天上帝于圜丘以太祖配大赦金人克相州守臣趙不試死之甲辰破德州兵馬都監趙叔畋死之是月節制陝西軍馬王庶為都統制曲端所拘奪其印金人攻晉寧軍守臣徐徽言拒卻之知府州折可求以城降金人破淄州涇原兵馬都監吳玠襲史斌斬之濱州賊蓋進陷棣州守臣姜綱之死之十二

月乙卯太后至杭州扈從統制苗傅以其軍八千人駐奉國寺庚申金人攻東平府京西路制置使權邦彥棄城去又攻濟南府守臣劉豫以城降甲子金人攻大名府提點刑獄郭永死之轉運判官裴億降又破襲慶府乙丑破虢州己巳以黃潛善為尚書左僕射兼門下侍郎汪伯彥右僕射兼中書侍郎顏岐門下侍郎朱勝非中書侍郎兵部尚書盧益同知樞密院事辛未金人攻青州戊寅以禮部侍郎張浚兼御營叅贊軍事教習長

兵是冬杜充決黃河自泗入淮以阻金兵

三年春正月庚辰朔帝在揚州以京西北路兵馬鈐轄  
翟興為河南尹京西北路安撫制置兼招討使京西賊  
貴仲正陷岳州甲申以資政殿學士路允迪簽書樞密  
院事丁亥金人再破青州又破濰州焚之而去京東安  
撫劉洪道入青州己丑奉安西京會聖宮累朝御容于  
壽寧寺趣大金通問使李鄴周望宋彥通吳德休等往  
軍前辛卯陝州都統邵興及金人戰于潼關敗之復號

州乙未杜充遣岳飛桑仲討其叛將張用于城南其黨  
王善救之飛等敗績庚子張用王善寇淮寧府守臣馮  
長寧却之丙午納罕克徐州守臣王復及子倚死之御  
營平寇左將軍韓世忠軍潰于沭陽其將張遇死之世忠  
奔鹽城金兵趣淮甸戊申至泗州二月庚戌朔始聽士  
民從便避兵命劉正彥部兵衛皇子六宮如杭州江淮  
制置使劉光世師潰于淮上金人攻楚州守臣朱琳降  
辛亥金人破天長軍壬子帝馳詣鎮江府是日金兵過

揚子橋癸丑游騎至瓜洲太常少卿季陵奉太廟神主以行失太祖神主王淵請幸杭州命留朱勝非守鎮江以吏部尚書呂頤浩為資政殿大學士江淮制置使都巡檢使劉光世為殿前都指揮使充行在五軍制置使駐鎮江府主管馬軍司楊惟忠節制江東軍馬駐江寧府是夕帝發鎮江金人入真州丁巳金人攻泰州守臣曾班以城降丁進縱兵剽掠王淵誘誅之戊午命朱勝非節制平江府秀州控扼軍馬禮部侍郎張浚副之又

命勝非兼御營副使留王淵守平江以忠訓郎劉俊民  
為閤門祇候使金軍詔錄用張邦昌親屬仍命俊民持  
邦昌貽金人約和書藁以行金人破滄州已未命呂頤  
浩往來經制長江以龍圖閣待制知江州陳彥文為沿  
江措置使庚申次崇德縣呂頤浩從行即拜同簽書樞  
密院事江淮兩浙制置使還屯京口又命御營中軍統  
制張俊以兵八千守吳江吏部員外郎鄭資之為沿江  
防托監察御史林之平為沿海防托募海舟守隘壬戌

駐蹕杭州金人克晉寧軍守臣徐徽言死之癸亥下詔  
罪已求直言省儀物膳羞出宮人之無職掌者乙丑降  
德音赦雜犯死罪以下放還士大夫被竄斥者惟李綱  
罪在不赦更不放還置江寧府權貨務都茶場戊辰金  
人焚揚州已巳黃潛善汪伯彥罷以戶部尚書葉夢得  
為尚書左丞御史中丞張浚為右丞庚午分命浙西監  
司等官募土豪守千秋垂腳襄陽諸嶺以扼宣常諸州  
險要金人去揚州辛未金人過高郵軍守臣趙士瑗棄



城走潰兵宋進犯泰州守臣曾班遁

按上巳書泰州守臣曾班降金矣此

云泰州守臣當是為金守泰州者其潰兵疑即高郵之兵而非金兵也

壬申呂頤浩遣將

陳彥渡江襲金餘兵復揚州癸酉靳賽犯通州韓世忠

小校李在叛據高郵甲戌黃潛善汪伯彥並落職乙亥

召朱勝非赴行在留張浚駐平江丙子詔士民直言時

政得失是月以王庶為陝西節制使知京兆府節制司

都統制曲端為鄜延經畧使知延安府三月庚辰以朱

勝非為尚書右僕射兼中書侍郎辛巳葉夢得罷以盧

益為尚書左丞未拜復罷為資政殿學士御營都統制  
王淵同簽書樞密院事呂頤浩為江南東路安撫制置  
使知江寧府癸未扈從統制苗傅劉正彥叛勒兵向闕  
殺王淵及內侍康履等帝以傅為慶遠軍承宣使御營  
使司都統制正彥渭州觀察使副都統制傅等迫帝遜  
位于皇子魏國公請隆祐太后垂簾同聽政是夕帝移  
御顯寧寺甲申尊帝為睿聖仁孝皇帝大赦以張浚兼  
中書侍郎韓世忠為御營使司提舉一行事務前軍統

制張俊為秦鳳副總管分其衆隸諸軍丁亥以東京留守杜充為資政殿大學士節制京東西路殿前副都指揮使東京副留守郭仲荀進昭化軍節度使呂頤浩至江寧戊子以端明殿學士王孝迪為中書侍郎盧益為尚書左丞己丑改元明受張浚奏乞睿聖皇帝親總要務庚寅以苗傅為武當軍節度使劉正彥為武成軍節度使劉光世為太尉淮南制置使范瓊為慶遠軍節度湖北制置使楊惟忠加少保張浚為禮部尚書及呂頤

浩並赴行在傅等以御營中軍統制吳湛主管步軍司  
黃潛善汪伯彥並分司衡永州居住以王孝迪盧益為  
大金國信使置行在都茶場金人破鄜州甲午呂頤浩  
率兵勤王乙未再敗黃潛善鎮東軍節度副使英州安  
置劉光世會呂頤浩于丹陽丙申韓世忠自鹽城至平  
江戊戌赴行在辛丑傅等以世忠為定國軍節度使張  
俊為武寧軍節度使知鳳翔府張浚責黃州團練副使  
郴州安置俊等皆不受壬寅盧益罷呂頤浩至平江水

賊邵青入泗州癸卯太后詔睿聖皇帝宜稱皇太弟天下兵馬大元帥康王皇帝稱皇太姪監國賜傅正彥鐵券呂頤浩張浚傳檄中外討傅正彥乙巳太后詔睿聖皇帝處分兵馬重事張俊率兵發平江劉光世繼之丙午以張浚同知樞密院事翰林學士李邴御史中丞鄭穀並同簽書樞密院事呂頤浩張浚發平江丁未次吳江朱勝非召傅正彥至都堂議復辟傅等遂朝帝于睿聖宮金人克京東諸郡劉洪道棄青州去達蘭以劉豫

知東平府節制河南州郡趙立復徐州夏四月戊申朔  
太后下詔還政皇帝復大位尊太后為隆祐皇太后己  
酉詔訪求太祖神主以苗傅為淮西制置使劉正彥副  
之庚戌復紀年建炎命張浚知樞密院事苗傅劉正彥  
並檢校少保呂頤浩張浚軍次臨平傅正彥夜遁辛亥  
皇太后撤簾傳犯富陽新城遣統制王德喬仲福追擊  
之癸未朱勝非顏岐王孝迪張浚路允迪俱罷以呂頤  
浩為尚書右僕射兼中書侍郎李昉尚書右丞鄭穀簽

書樞密院事甲寅以劉光世為太尉御營副使韓世忠為武勝軍節度使御前左軍都統制張俊為鎮西軍節度使御前右軍都統制斬中軍統制吳湛工部侍郎王世修于市乙卯大赦許中外直言丁巳禁內侍交通主兵官及借役禁兵干預朝政庚申詔尚書左右僕射並帶同中書門下平章事改門下中書侍郎為叅知政事省尚書左右丞以李邴叅知政事苗傅犯衢州癸亥以給事中周望為江浙制置使丁卯帝發杭州留鄭穀衛

皇太后以韓世忠為江浙制置使及劉光世追討傅正  
彥壬申立子魏國公尊為皇太子是月劉文舜寇濠州  
西北賊薛慶襲據高郵軍五月戊寅朔帝次常州以張  
浚為宣撫處置使以川陝京西湖南北路隸之聽便宜  
黜陟庚辰苗傅統領官張翼斬王鈞甫馬柔吉以降辛  
巳次鎮江府癸未以翰林學士滕康同簽書樞密院事  
乙酉至江寧府駐蹕神霄宮改府名建康起復朝散郎  
洪皓為大金通問使丁亥以徽猷閣直學士陳彥文提



領水軍措置江浙防托已丑韓世忠追討傅正彥于浦  
城縣獲正彥傅遁走張浚撫諭薛慶于高郵為慶所留  
乙未浚罷以御營前軍統制王瓊為淮南招撫使已亥  
苗傅將江池殺苗翊以降傅走建陽縣土豪詹標執之  
以獻辛丑張浚還自高郵復命知樞密院事是月翟興  
擊殺楊進餘黨復推其徒劉可拒官軍六月戊申東京  
留守杜充引兵赴行在命兼宣撫處置副使節制淮南  
京東西路已酉罷王安石配享神宗廟庭以司馬光配

王善攻淮寧府不克轉寇宿州統領王冠敗之乙卯以  
浙西安撫使康允之為制置使丙辰劉光世招安苗傅  
將韓雋戊午命江浙淮南引塘灤開畝澮以阻金兵庚  
申皇太后至建康府辛酉以久陰下詔罪已以帶御器  
械李質權同主管殿前司乙丑以建康府路安撫使連  
南天兼建康府宣徽太平等州制置使丁卯以趙鼎為  
右司諫癸酉以右司郎中劉寧止為沿江措置副使甲  
戌移御行宮乙亥詔諭中外以迫近防秋請太后率宗

室迎奉神主如江表百官庶府非軍旅之事者並令從  
行金人破磁州秋七月己卯慮囚辛巳苗傅劉正彥伏  
誅癸未進韓世忠檢校少保武勝昭慶軍節度使御營  
使司都統制范瓊自洪州入朝以瓊為御營使司提舉  
一行事務後軍統制辛企宗為都統制命學士院草夏  
國書大金國表本付張浚金人逼山東安撫使劉洪道  
棄濰州遁萊州守將張成舉城降丁亥下范瓊大理獄  
皇太子薨戊子鄭穀薨己丑以資政殿大學士王絢叅

知政事兵部尚書周望同簽書樞密院事辛卯升杭州  
為臨安府壬辰賜范瓊死劉洪道復青州丁酉遣崔縱  
使于金軍辛丑王瓊與靳賽戰敗績壬寅命李昫滕康  
權知三省樞密院事扈從太后如洪州以杜充同知樞  
密院事兼宣撫處置副使乙巳山東賊郭仲威陷淮陽  
軍翟興引兵入汝州與賊王俊戰敗之八月庚戌李昫  
罷壬子以吏部尚書劉珏為端明殿學士權同知三省  
樞密院事甲寅王庶罷以徽猷閣直學士知慶陽府王

似為陝西節制使劉文舜入舒州己未太后發建康丁  
卯遣杜時亮使于金軍閏月丁丑以胡舜陟為沿江都制  
置使集英殿修撰王義叔副之丁亥輔達掠漣水軍殺  
軍使郝璘降于王瓊己丑以呂頤浩守尚書左僕射杜  
充守右僕射並同中書門下平章事辛卯以杜充兼江  
淮宣撫使韓世忠為浙西制置使劉光世為江東宣撫  
使丁酉太后至洪州己亥減福建廣南歲土供銀三之  
一壬寅帝發建康復還浙西是月知濟南府宮儀及金

人戰于密州兵潰守將李遼以密州降金靳賽詣劉光  
世降九月丙午朔日有食之辛亥次平江府壬子金人  
破單州與仁府遂克南京守臣凌唐佐降之癸丑以周  
望為兩浙荆湖等路宣撫使翰林學士張守同簽書樞  
密院事丙辰遣張邵等充金國軍前通問使金人破沂  
州却高麗入貢使張浚承制罷知潭州辛炳起復直龍  
圖閣向子諲代之丁巳蠲諸路青苗積欠錢癸亥賜宿  
泗州都大提舉使李成軍絹二萬匹成尋復叛己巳以

知鎮江府陳邦光為沿江都制置使庚午以工部侍郎  
湯東野知平江府兼浙西制置使甲戌金帥羅索攻長  
安經畧使郭瑛棄城遁河北賊酈瓊圍光州冬十月庚  
辰禁諸軍擅入川陝癸未帝至杭州復如浙東庚寅渡  
浙江郭仲威詣周望降望以仲威為本司統制辛卯李  
成臨滁州殺守臣向子伋壬辰帝至越州戊戌初命東  
南八路歲收經制五項錢輸行在金人破壽春府庚子  
破黃州守臣趙令歲死之辛丑張浚以同主管川峽茶

馬趙開為隨軍轉運使專總四川財賦金人自黃州濟江劉光世引軍遁知江州韓杞棄城去金人趨洪州是月京西賊劉滿陷信陽軍殺守臣趙士負盜入宿州殺通判盛修已十一月乙巳金人攻廬州守臣李會以城降丁未降雜犯死罪以下聽李綱自便貴仲正犯荆南兵馬鈐轄渠成與戰斬之戊申金帥烏珠攻和州守臣李儔以城降通判唐璟死之己酉烏珠攻無為軍守臣李知幾棄城走壬子太后退保虔州江西制置使王子



獻棄洪州走丁巳金人破臨江軍守臣吳將之遁戊午  
遣孫悟等充金國軍前致書使金人攻洪州權知州事  
李積中以城降撫袁二州皆降淮賊劉忠犯蘄州韓世  
清逆戰破之忠入舒州殺通判孫知微庚申金人攻真  
州守臣向子志棄城去辛酉太后至吉州壬戌金人攻  
建康府破溧水縣尉潘振死之癸亥金人破太平州主  
管步軍司閤勅自西京奉累朝御容至行在詔奉安于  
天慶觀尋命勅節制淮西軍馬甲子杜充遣都統制陳

淬岳飛等及金人戰于馬家渡王瓊以軍先遁淬敗績死之乙丑太后發吉州次太和縣護衛統制杜彥及後軍楊世雄率衆叛犯永豐縣知縣事趙訓之死之金人至太和縣太后自萬安陸行如虔州丁卯金人攻吉州守臣楊淵棄城走又破六安軍己巳帝發越州庚午復還以周望同知樞密院事仍兼兩浙宣撫使殿前都指揮使郭仲荀為副使右軍都統制張俊為浙東制置使御史中丞范宗尹叅知政事辛未烏珠入建康府守臣陳

邦光及在籍戶部尚書李杭迎降通判楊邦乂拒之杜

充叛降于金

宋紀不載杜充降金而于四年二月書杜充罷是誤以削充籍為罷也茲據充傳增

輯

癸酉帝如明州金人攻建昌軍甲戌烏珠殺楊邦乂

江淮軍撫司潰卒李選攻臨鎮江淮西兵馬都監王宗

望以濠州降于金是月桑仲自唐州犯襄陽京西制置

使程千秋出走仲據襄陽十二月丙子帝至明州丁丑

江淮宣撫司準備將戚方叛犯鎮江府殺守臣胡唐老

辛巳金人破常州又破廣德軍壬午議航海避兵禁卒

張寶等作亂呂頤浩擒斬之甲申張浚承制拜涇原經  
畧使曲端為威武大將軍宣撫處置使司都統制乙酉  
烏珠攻臨安府守臣康允之棄城走錢塘縣令朱蹕死  
之己丑帝次定海縣癸巳帝次昌國縣乙未杜彥攻潭  
州又破洪州戊戌金人攻越州安撫使李鄴以城降衛  
士唐琦死之郭仲荀奔温州庚子移幸溫台癸卯黃潛  
善卒于英州

四年春正月甲辰朔御舟碇海中乙巳金人攻明州丙

午帝次台州章安鎮己酉遣使如處州問安太后庚戌  
金人再攻明州張俊引兵去浙東副總管張思政及劉  
洪道繼遁癸丑貶郭仲荀汝州團練副使廣州安置丁  
巳金帥羅索入陝州守臣李彥仙死之己未金人破明  
州進破定海辛酉帝發章安鎮甲子治溫州港口乙丑  
以中書舍人李正民為兩浙湖南江西撫諭使詣太后  
問安丁卯台州守臣晁公為棄城遁劉可為其黨所殺  
復推劉超據荆門軍戊辰滕康劉珏罷仍奪職辛未命

臣僚條具措置之策駐蹕之所是月金人攻楚州守臣趙立拒之金人攻邠州曲端遣涇原路副總管吳玠拒之于彭原金人破同州二月甲戌鄜瓊率衆降于劉光世叛將傳選詣處州降乙亥奉安祖宗神御于福州復以盧益為資政殿學士李回端明殿學士並權知三省樞密院事金人破潭州將吏王暕劉价趙聿之戰死向子諲出走丙子金人自明州引兵還臨安丙戌金人自臨安退軍命劉光世追之丁亥金人破東京權留守上

官悟走死庚寅帝次溫州浙東防遏使傅崧卿入越州  
辛卯金人破秀州甲午知蔡州程昌寓棄城走鼎州民  
鍾相作亂自稱楚王丙申以金兵退肆赦戊戌金人入  
平江鍾相陷澧州湖北制置使傅雱招降孔彥舟以為  
湖南北捉殺使金人破醴州是月張浚自秦州引兵入  
援三月癸卯孔彥舟入鼎州金人去平江丁未諭兩浙  
富民助米以備巡幸辛亥遣兵部員外郎馮康國等撫  
諭荆湖南北廣南諸路壬子金人入常州守臣周杞棄

城去甲寅遣盧益及御營都統制辛企宗奉迎太后東還丙辰金人攻終南縣經畧使鄭思死之辛酉御舟發溫州御營前軍將楊勅叛戊辰孔彥舟擊鍾相擒之己巳戚方陷廣德軍夏四月癸酉蠲江西州縣被兵民夏稅戊寅吳玠及金人戰于邠州彭原店敗績部將楊晟死之己卯以觀文殿學士朱勝非為江西湖南北宣撫使癸未帝駐越州甲申下詔親征巡幸浙西韓世忠駐軍揚子江要金人歸路烏珠引軍走建康乙酉戚方圍



宣州劉光世遣統制王德誘誅劉文舜于饒州丙申呂  
頤浩罷為鎮南軍節度使醴泉觀使命三省樞密院同  
班奏事韓世忠及烏珠戰于江中敗績烏珠渡江屯六  
合縣戊戌振明州被兵民已亥以張浚為浙西江東制  
置使辛丑王德破妖賊王宗石于信州是月金人入江  
西者自荊門軍北歸五月甲辰以范宗尹為尚書右僕  
射兼御營使辛亥統領赤心隊軍馬劉晏及戚方戰于  
宣州敗績死之壬子金人焚建康府淮南宣撫司統制

岳飛擊走之癸丑以張守叅知政事趙鼎簽書樞密院  
事甲寅金人破定遠縣間勅死之巨師古擊戚方于宣  
州數敗之方引去乙卯王綯罷丁巳楊勅犯婺州甲子  
周望罷尋分司衡州居住置京畿淮南湖北京東西路  
鎮撫使是月劉超據荆南分兵犯峽州又合叛將彭筠  
犯復州淮西敗將崔增陷焦湖水砦河東北經制使王  
俊復潁昌府六月辛未蠲紹興府三縣湖田米詔侍從  
臺諫諸將集議駐蹕事宜楊勅犯處州癸酉遣統制陳

思恭討勅再貶周望昭化軍節度副使連州安置甲戌  
罷御營司以范宗尹兼知樞密院事乙亥王瓊遣統領  
林閏等追襲楊勅于東陽縣敗績裨將李在死之丁丑  
以劉光世部兵為御前巡衛軍光世為都統制楊勅等  
焚建州戚方犯湖州安吉縣戊寅以知建康府權邦彥  
為淮南等路制置發運使滁濠鎮撫使劉位為賊張文  
孝所殺命其子綱襲職辛巳慮囚甲申岳飛破戚方于  
廣德軍乙酉鍾相將胡源引兵入慈利縣執其黨陳誠

來降丙戌以呂頤浩為建康路安撫大使劉光世為兩  
浙路安撫大使朱勝非為江州路安撫大使郭仲威為  
真揚州鎮撫使戚方詣張俊降辛卯妖賊王宗石等伏  
誅壬辰權密州都巡檢徐文率部兵泛海來歸乙未郭  
仲威犯鎮江府是月烏珠自六合引兵趨陝西秋七月  
乙巳馮長寧復順昌府張浚罷曲端都統制丁未以劉  
光世為集慶軍節度使開府儀同三司戊申以孔彥舟  
為辰沅靖州鎮撫使宣撫司統制官呂世存王俊復廊

州軍將王闢叛陷歸州鈐轄田祐恭擊敗之己酉王闢  
犯房州守臣韋知幾棄城走癸丑崔增犯太平州守臣  
郭偉拒却之乙卯金人徙二帝自韓州之五國城丁巳  
申命元祐黨人子孫于州郡自陳盡還當得恩數韓世  
忠張俊並罷庚申以岳飛為通泰州鎮撫使乙酉復李  
邦彥以下十九人官職聽自便張浚貶曲端階州居住  
丁卯金人立劉豫為帝國號齊己巳程昌寓擒李合戎  
于松滋縣是月張用據漢陽軍沿江措置副使李允文

招降之八月辛未以禮部尚書謝克家參知政事壬申  
李成請降于江州張浚停程千秋官文州編管丁丑以  
韓世忠為檢校少師武成感德軍節度使張俊檢校少  
保寧武昭慶軍節度使庚辰太后至自虔州薛慶及金  
人戰于揚州城下死之癸未盧益罷張浚復永興軍再  
貶曲端海州團練使萬州安置甲申陳萬信餘黨雷進  
作亂乙酉焚慈利石門二縣以御營司參議官王擇仁  
權河東制置使山砦首領韋忠佺為都統制宋用臣馮

賽同都統制丙戌以李成為四州鎮撫使戊子以饒州妖賊平赦二州徒以下囚蠲民今年役錢辛卯杜漵渡江討羣賊復石首等五縣壬辰盜入梅州殺守臣沈同之甲午金人破承州戊戌以桑仲為襄陽鄧隨郢州鎮撫使九月壬寅詔諸路決囚甲辰徽宗皇后鄭氏崩于五國城戊申劉豫僭位于北京乙卯桑仲陷均房州進犯白土關丙辰金人攻楚州趙立死之丁巳趙霖復和州李成犯興國軍戊午荆襄賊趙延壽犯德安府陳規

拒却之己未金均房安撫使王彥及桑仲戰于平麗縣  
敗之王聞諳彥降辛酉李捧擎范汝為于建州軍潰金  
人攻揚州統制靳賽逆戰于港河却之金人破延安府  
及保安軍癸亥張浚遣都統劉錫統五路兵及金將  
羅索戰于富平縣大敗戊辰趙延壽焚郢州金人破楚  
州鎮撫使李彥先死之冬十月庚午張浚斬環慶經畧  
使趙哲于邠州貶劉錫合州安置浚退保秦州辛未秦  
檜自金營來歸戊寅鍾相餘黨楊華圍桃源縣己卯馬



進犯江州癸未程昌寓入鼎州擊楊華破之丁亥以李  
回同知樞密院事庚寅召張浚入援追復李邦彥觀文  
殿大學士辛卯虔州賊李敦仁及弟世雄破虔州石城  
縣乙未岳飛擊金人于承州是月馮長寧棄城去尋以  
淮寧附劉豫江東賊張琪犯建康府劉洪道招降之環  
慶路統制慕容洧叛附于夏國涇原統制張中彥經畧司  
幹辦趙彬叛降于金劉忠據岳州平江縣白面山王善  
餘黨祝友作亂屯滁州龔家城十一月癸卯慕容洧遂引

金人圍環州呂頤浩復南康軍甲辰趙鼎罷乙巳秦檜  
入見丙午岳飛棄泰州丁未以御史中丞富直柔簽書  
樞密院事秦檜為禮部尚書呂頤浩會楊惟忠與馬進  
戰于南康軍不利戊申頤浩遣巨師古救江州為進所  
敗師古奔洪州金人破涇原經畧使劉錡退屯瓦亭己  
酉以孔彥舟為湖南副總管丙辰金人破泰州丁巳通  
州守臣呂伸棄城去王彥攻桑仲于黃水破之房州平  
張浚以彥為金均房州鎮撫使崔增犯池州劉洪道遣

統制李貴擊走之增詣呂頤浩降丙寅金房州賊郭希犯歸  
州田祐恭擊卻之是月張浚退軍興州秦鳳副總管吳  
玠收餘兵保大散關東和尚原括借諸路寺觀田租蘆  
場三年十二月庚午安南請入貢卻之辛未括饒信諸  
州錢糧凡江湖川廣上供皆拘之丁丑馬進分兵犯洪  
州乙丑李敦仁犯撫州崇仁縣壬辰金人攻熙州總管  
劉惟輔擊卻之甲午再攻熙州惟輔軍潰死之乙未以  
張浚為江南招討使丁酉范汝為降是月張浚承制復

海州團練副使曲端左武大夫興州居住

紹興元年春正月己亥朔帝在越州帥百官遙拜二帝  
改元釋流以下囚復賢良方正直言極諫科蠲兩浙夏  
稅和買紬絹絲綿減福建路上供銀三分之一戊申改  
命張俊為江淮路招討使以呂頤浩為江東路安撫大  
使朱勝非江西路安撫大使馬進陷江州己酉金人攻  
揚州又攻秦州吳玠擊敗之庚戌又攻西寧州守臣俱  
重迎降辛亥謝克家罷壬子張中孚以原州叛降于金

癸丑曹成入漠陽軍李允文招之成入鄂州復趨江西  
丁巳呂頤浩遣王瓊崔增擊賊于湖口大敗之辛酉詔  
太祖創業垂統神宗詔封子孫一人為安定郡王世世  
勿絕今依故事舉行金人再圍環州是月張浚復曲端  
榮州刺史提舉江州太平觀閬州居住尋移恭州二月  
戊辰宜章縣民李冬至二作亂犯英連韶郴諸州祝友  
降庚午李成黨邵友犯筠州守臣王庭秀棄城去辛未  
犯臨江軍守臣康倬遁壬申初定歲祀天地社稷如秦

告之禮丁丑鄜延將李永琦叛犯慶陽府己卯以辛企  
宗為福建制置使辛巳以秦檜叅知政事三月戊戌呂  
頤浩遣崔增王瓊擊李成于湖口大敗之壬寅禁諸路  
遏糴丙午張俊楊沂中岳飛擊馬進大敗之孔彥舟掠  
潭州趨衡州己酉李成犯饒州庚戌張俊楊沂中擊馬  
進于筠河敗之復筠州辛亥男子崔紹祖詐稱越王中  
子作亂甲寅罷諸州免行錢乙卯金人破階州庚申劉  
超犯澧州統制杜湛拒之甲子張俊追馬進至江州進

戰敗遁去乙丑楊沂中趙密追擊之又大敗之振淮南  
京東西流民荆湖東路安撫使向子諲說降馬友與共  
討李冬至二平之夏四月庚午張琪復叛犯當塗縣金  
將達蘭渡淮屯宿遷縣馬樂湖乙亥劉光世復楚州階  
州統領杜肇復階州馬友引兵入潭州戊寅杜琪棄澧  
州劉超入據之己卯金涇原帥趙彬攻耀州淮賊寇宏  
犯濠州庚辰隆祐皇太后崩癸未桑仲陷鄧州守將譚  
克棄城走河東招捉使王俊引兵來援仲執斬之乙酉

為太后制暮年服是月京西賊李忠陷商州守臣楊伯  
孫棄城走呂頤浩遣統制閻臯通判建昌軍蔡延世襲  
擊李敦仁擒其弟世雄世臣五月丙辰蠲江西路被賊  
州縣賦稅丁酉詔呂頤浩朱勝非劉光世並兼淮南諸  
州宣撫使始奪李成官戊戌以張用為舒蘄鎮撫使癸  
卯金人攻和尚原吳玠擊却之劉光世遣統制王德襲  
揚州執郭仲威以獻伏誅辛亥水軍統制邵青叛圍太  
平州趙彬及金人合兵圍慶陽府守臣楊可昇擊却之



甲寅命知南外宗正事令應選年幼宗子將育於宮中  
庚申孔彥舟引衆過潭州馬友迎擊大敗之彥舟趨岳  
州犯鄂州壬戌劉光世招降邵青趙延壽據分寧縣呂  
頤浩招降之是月張俊及李成戰于黃梅縣殺馬進成遁  
歸劉豫張用復叛寇江西岳飛招降之六月甲戌張琪  
犯餘杭州又犯宣州庚辰湖賊楊華楊廣犯鼎州程昌  
寓拒邵之壬午權檟昭慈獻烈皇后于越州張琪犯徽  
州守臣郭東棄城去琪入據之癸未李允文降丁亥崇

安民廖公昭合范汝為餘黨熊志寧作亂志寧遂與建陽民丁朝佐合兵陷二縣戊子處囚己丑邵青犯江陰軍之福山南安賊吳忠宋破壇劉洞天作亂庚寅江西提刑司討誅之癸巳熙河統制關師古洮東安撫郭玠同討熙州叛兵連敗之甲午廣賊鄧慶龔富圍南雄州蠲建劔汀州邵武軍租秋七月乙未以馬友權荆湖東路副總管統制潘逵後軍將胡江等叛破玉山弋陽永豐三縣戊戌吳錫復入邵州庚子以岳飛為神武右副

軍統制辛丑封伯右武衛大將軍令詒為安定郡王壬寅虔州賊陳顥作亂丙午劉光世遣將喬仲福擊邵青于常熟為所敗達蘭自宿遷北歸戊申韓世清復祁門縣庚戌張俊執傅雱赴行在張浚以曲端屬吏辛酉張琪犯饒州呂頤浩遣閻臯擊敗之琪黨姚興降琪走徽州癸亥范宗尹罷是月珍州守臣李玠棄城去王彥數擊敗李忠趙彬來歸張浚承制以彬為陝西轉運使又以涇原兵馬都監李彥琪為本路副總管彥琪尋叛去

八月丙寅以孔彥舟為蘄黃鎮撫使丁卯以知潭州吳敏為荊湖東西廣南路宣撫使張浚殺曲端于恭州獄張用至瑞昌歸張浚浚以為本軍統制癸酉復以汪伯彥為江東安撫大使乙亥呂頤浩遣將李鑄復舒州丁丑柎昭慈獻烈皇后神主于温州太廟戊寅張守罷以李回參知政事富直柔同知樞密院事庚辰杜湛及劉超戰于彭山敗績辛巳超及楊華楊廣合寇鼎州程昌寓擊敗之韓世清及張琪戰敗績琪復入祁門縣丁亥

以秦檜為尚書右僕射同中書門下平章事兼知樞密院事庚寅復李綱資政殿大學士辛卯蠲徽州被賊民夏稅是月知鄂州曹成掠湖西犯沅州與知復州李宏合屯瀏陽既而攻宏奔潭州九月甲午張琪黨李捧犯宣州守臣李彥卿及韓世清擊却之丙申斬李世臣己亥以資政殿學士葉夢得為江南東路安撫大使兼壽春等六州宣撫使庚子張琪復陷宣州辛亥合祭天地于明堂大赦錄用元符末上書人子孫癸丑復以呂

願浩為尚書左僕射同中書門下平章事兼知樞密院  
事丁巳王彥破李忠于秦郊店忠奔歸劉豫戊午落范  
宗尹觀文殿學士己未初措置河南諸鎮屯田以戶部  
尚書孟庾為江東西湖東等路宣諭制置使辛酉詔有  
建策能還兩宮者實封以聞有効者賞以王爵冬十月  
乙丑詔蔡京王黼門人實有才能者公舉叙擢李回罷  
丙寅朱勝非分司江州居住己巳王德昭邵青降之庚  
午以孟庾參知政事劉洪道招降李捧董旺癸酉金烏

珠攻和尚原吳玠及弟璘擊敗之戊寅以張俊為太尉  
壬午初置見錢關子招人入中以給軍食范汝為復叛  
入建州守臣王浚明棄城走甲申劉超降戊子崔紹祖  
伏誅己丑知承州王林禽張琪于楚州癸巳范汝為犯  
邵武軍守臣吳必明統制李山拒之衆潰退保光澤縣  
關師古復秦州獲郭振是月劉豫將王世冲寇廬州守  
臣王亨大破之斬世冲曹成及馬友戰于潭州成敗還  
攸縣王才將丁順圍濠州劉光世遣兵攻橫澗山順解

團去十一月乙未葉夢得至建康招王才降之戊戌詔  
移蹕臨安以孟庾為福建江西荆湖宣撫使神武左軍  
都統制韓世忠副之己亥范汝為犯光澤縣乙巳張琪  
伏誅庚戌富直柔罷丙辰程昌寓遣杜湛擊楊華敗之  
己未楊華降辛酉以吏部侍郎李光節制臨安府內外  
諸軍壬戌曹成犯安仁縣執安撫使向子諲進攻道州  
是月前知廓州李惟德以岷州來歸十二月乙丑吳敏  
罷丙寅范汝為寇南劍州守臣張甯擊破之乙亥辛企



宗罷仍追三官丁丑蠲諸路在官積欠以岳飛為神武副  
軍都統制曹成陷道州守臣向子志棄城走戊寅以星  
變求直言遣駕部員外郎李愿撫諭川陝庚辰桑仲寇  
復州守臣祖通棄城去辛巳知海州薛安靖殺偽都巡  
檢使王企中以城來歸增諸路酒錢以備軍費甲申知  
龍州范綜統制雷仲復水洛城己丑起復陝西都統制  
吳玠為鎮西軍節度使是月劉豫遣將王彥充攻壽春  
府桑仲復寇金州王彥拒戰于馬郎嶺大破之均州平

蔡州褒信縣弓手許約叛據光州階州安撫孫注復洮州龔富等圍南劍州

二年春正月癸巳朔帝在紹興府率百官遙拜二帝甲午詔復置賢良方正直言極諫科丙申韓世忠圍建州丁酉蠲諸路元年逋稅庚子陝西叛將白常圍岷州關師古擊破之辛丑韓世忠拔建州范汝為自焚死餘黨悉平壬寅帝發紹興丙午至臨安府癸丑以張俊檢校少保定國軍節度使劉豫遣兵犯伊陽縣翟興及其將

李恭合擊敗之曹成犯郴州永興縣已未修臨安城辛酉楊勅復謀作亂江西副總管楊惟忠誘誅之二月甲子楊華復叛擾鼎澧潭三州丙寅命劉光世屯揚州經理淮東庚午以李綱為觀文殿學士湖廣宣撫使甲戌以吏部尚書李光為淮西招撫使王玠副之丁丑分崔增李捧邵青趙延壽李振單德忠徐文所部兵為七將名御前忠銳軍隸步軍司非樞密奉旨不許調遣減淮南營田歲租三之二俟三年復舊壬午程昌寓遣杜湛

攻賊周倫破之是月知商州董先叛附劉豫金人破慶陽府楊可昇降之三月壬辰命襄鄧鎮撫使桑仲收復臨沒諸郡再貶徐秉哲惠州吳玠南雄州莫儔韶州並居住水賊翟進襲漢陽軍殺守臣趙令弒李光執韓世清于宣州以歸戊戌葉夢得罷以李光為江東安撫大使兼滁濠等六州宣撫使罷江淮發運司桑仲如郢州守將霍明殺之庚子金人攻方山原辛丑又攻隴安縣吳璘等擊却之淮南營田副使王寔括閒田三萬頃給

六軍耕種己酉以神武右軍中部統制楊沂中為神武  
中軍統制癸丑河南鎮撫使翟興為部將楊偉所殺庚  
申曹成寇賀州清水砦守臣劉全棄城去是月知壽春  
府陳卞及鈐轄陳寶等復順昌府尋引兵歸為偽齊所  
逐并壽春失之夏四月甲子曹成陷賀州陳顥圍循州  
焚龍川縣庚午以翰林學士承旨翟汝文叅知政事壬  
申釋福建諸州雜犯死罪以下戊寅偽齊統領王資率  
兵來歸乙酉李綱始拜命置司福州太平州軍校陸德

據城叛戊子以呂頤浩都督江淮荆浙諸軍事庚寅劉  
豫徙居汴京是月王彥大破董先于馬嶺關復商州閏  
月乙未知池州王進討陸德誅之丙申岳飛擊破曹成  
于賀州辛丑韓世清伏誅丙午岳飛敗曹成于桂嶺縣  
成走連州遣統制張憲追擊破之成走郴州入邵州五  
月辛酉以兵部尚書權邦彥簽書樞密院事癸亥呂頤  
浩出師甲子以霍明權襄鄧隨郢州鎮撫使詔觀察使  
已上各薦可備將帥者二人辛未選宗室子偁之子伯

琮育于禁中丙子呂頤浩至常州前軍將趙延壽叛于  
呂城鎮丁丑犯金壇縣殺知縣胡思忠戊寅海州賊王  
山犯漣水軍總領蘇復副統制劉靖擊敗之甲申親慮  
囚自是歲如之乙酉劉光世遣王德追趙延壽叛兵至  
建平縣誅之丙戌置修政局命秦檜提舉丁亥以中書  
門下省檢正官仇愈為沿海制置使是月韓世忠至洪  
州招曹成降之六月庚寅李宏入潭州執馬友殺之戊  
戌詔孟庾韓世忠班師岳飛屯駐江州庚子以劉光世

為寧武寧國軍節度使韓世忠為太尉移屯建康府辛丑以李橫為襄郢鎮撫使李道鄧隨鎮撫使壬寅翟汝文罷孔彥舟叛降偽齊乙巳以權邦彥兼權叅知政事戊申仇愈兼制置福建路甲寅召呂頤浩赴行在令叅謀官傅崧卿權主管都督府事詔兩浙江淮守臣存撫東北流寓人乙卯韓世忠遣統制解元巨振入潭州執李宏以歸秋七月辛酉悉蠲福建諸州被兵民田租已起復翟琮為河南府孟汝唐州鎮撫使戊寅知廬州



王亨復安豐壽春縣庚辰韓世忠擊劉忠于岳州大破之八月壬辰以孟庾兼權同都督江淮荆浙諸軍事甲午安定郡王令話薨戊戌命朱勝非提舉醴泉觀兼侍讀日赴朝堂議事戊申江西統制傅樞討平南雄賊張忠鄧慶劉軍一等甲寅秦檜罷九月戊午落秦檜職辛酉以星變大赦許中外臣民直言時政壬戌王倫自金還入見遣潘致堯等為金國軍前通問使附茶藥金幣進兩宮甲子以直徽猷閣郭偉為淮西巡撫使乙丑復

以朱勝非為尚書右僕射同中書門下平章事兼知樞  
密院事戊辰司空山賊李通降癸酉以右朝請大夫呂  
源為浙東福建沿海制置使知建昌軍朱芾擊石陂賊  
余照禽斬之丙子復以郭仲荀為武泰軍節度使辛巳  
以韓世忠為江南東西路宣撫使丙戌以知興元府王  
似為川陝宣撫處置副使丁亥封右監門衛大將軍榮  
州防禦使令時為安定郡王是月韓世忠遣統制鮮元  
擊劉忠子蘄陽大破之忠奔劉豫冬十月庚寅李勑伏

誅甲辰潘致堯至楚州通判州事劉晏劫其禮幣奔劉  
豫守臣柴春戰死戊申以知平江府趙鼎為江東安撫大使  
是月顏孝恭招降石陂餘賊李寶等十一月辛酉陳顥  
臨汀州武平縣犯梅循二州辛未議將撫師江上召侍  
從官條具利害戊寅范汝為餘黨范忠掠龍泉縣庚辰  
詔宣諭五使焚所至州縣建炎以前已蠲稅籍是月關  
師古敗偽齊兵于抹邦山馬友黨步諒詣李綱降綱入  
潭州其黨郝晟降王進吳錫禽王浚湖南盜賊悉平十

二月己丑偽稱榮德帝姬易氏伏誅范忠犯處州巨師古引兵入廬州執王亨送行在甲午李綱罷丁酉岳飛遣統領徐慶王貴討禽萍鄉賊高聚己亥以胡舜陟為廬壽等州鎮撫使金人侵熙秦關師古擊却之辛丑程昌寓遣杜湛討楊欽等敗之甲辰罷張浚宣撫處置使仍知樞密院以知夔州盧法原為川陝宣撫處置副使及王似同知司事辛亥金人攻高州李橫敗偽齊兵復汝州甲寅命孟庾同都督江淮荆浙諸軍事詔都督府

總治江東西湖北浙西帥臣經畫屯田是冬金人攻和尚原吳玠拔砦棄去虔賊謝達犯惠州

三年春正月丁巳朔帝在臨安率百官遙拜二帝江西將李宗諒誘戍兵叛寇筠州統領趙進擊卻之翟琮入西京禽偽齊留守孟邦雄庚申金人攻上津李橫破潁順軍偽齊知軍蘭和降壬戌金人攻金州洵陽縣以仇愈為福建兩浙淮東路沿海制置使甲子李橫復潁昌府金人破金州辛未李通為其徒王全所殺癸酉以湯

東野為淮東安撫使乙亥以李橫為襄陽府鄧隨郢州  
鎮撫使丁丑登萊山砦統制范溫率部兵泛海來歸庚  
辰詔春秋望祭諸陵癸未詔民復業者視墾田多寡定  
租額賦役乙酉減淮浙蠶鹽錢二月己丑權邦彥薨浙  
東賊彭友犯龍泉縣辛卯李通餘黨劉德圍舒州金人  
攻饒風闕破之吳玠奔西縣王彥奔達州己亥金帥薩  
里罕入興元府經畧使劉子羽焚其城走三泉縣吳玠  
退屯仙人關庚子以宗子伯琮為和州防禦使賜名瑗

辛丑錫廣東諸州被賊民租乙巳翟琮遣統制李吉敗  
偽齊兵于伊陽丁未王似始受宣撫副使之命戊申虔  
賊周十隆犯循梅汀州庚戌以李橫為神武左軍副統  
制京西招撫使改胡舜陟為淮西安撫使辛亥以工部  
尚書席益參知政事翰林學士徐俯簽書樞密院事壬  
子王全犯廬州三月壬戌胡舜陟至廬州王全降甲子  
以趙鼎為江西安撫大使李橫傳檄諸軍收復東京已  
巳金人遣兵援劉豫李橫敗走穎昌復陷壬午以韓世

忠為淮南東路宣撫使李綱遣兵擊李宗諒降之夏四月丁亥朱勝非去位偽齊知虢州董震及其統制董先來歸以震權高號陝州鎮撫使己丑詔江東西湖北浙西募民佃荒田蠲三年租辛卯以劉光世為檢校太傅江南東路宣撫使金人去興元甲午偽齊知唐州胡安中來歸丙申偽齊李成攻陷虢州丁未岳飛遣統領張憲王貴擊彭友斬之劉忠為部下王林所殺傳首行在辛亥徐文敷奔偽齊五月丙辰以翟琮為河南府孟汝



鄭州鎮撫使董先為副使丁卯以韓肖胄等充金國軍  
前通問使安化蠻犯邊廣西經畧使許中擊之戊辰楊  
沂中招降嚴州賊繆羅等庚午以岳州數被兵免今年  
稅役乙亥以方與金議和禁邊兵犯齊境丙子王彥復  
金州金兵棄均房去以吳玠為利州路階成鳳州制置  
使庚辰召張浚赴行在詔李橫等收軍還鎮六月丁亥  
禁諸路招納淮北人及中原軍來歸者戊子復元祐宰  
相呂大防官職贈謚庚寅降川陝死罪以下是月金人

園方山原王似命吳玠救之秋七月甲子以久旱償州縣和市民物之直已巳詔減膳禁屠弛工役罷苛饒命諸路憲臣親按部錄囚辛未蠲紹興二年和市絀帛乙亥朱勝非起復八月己丑詔岳飛赴行在己亥翟琮棄伊陽奔襄陽詔即屯駐之癸卯罷諸路輸禁軍闕額錢甲辰求直言九月戊午呂頤浩罷庚申川陝統領官吳勝敗偽齊兵于黃堆砦丙寅以趙鼎為江西安撫制置大使甲戌偽齊寇徐宿二州乙亥以劉光世為江東淮

西宣撫使置司池州韓世忠為鎮江建康府淮南東路  
宣撫使置司鎮江府王瓊為荆南府岳鄂潭鼎澧黃州  
漢陽軍制置使置司鄂州岳飛為江南西路舒蘄州制  
置使置司江州主管殿前司郭仲荀知明州兼沿海制  
置使神武中軍統制楊沂中兼權殿前司已卯吳勝克  
蓮花城冬十月庚寅加吳玠檢校少保已亥禁州縣擅  
增置稅場偽齊李成陷鄧州辛丑南丹蠻莫公晟圍觀  
州焚寶積監殺知監陳烈壬寅偽齊兵逼襄陽李橫棄

欽定四庫全書

卷三十四

城奔荆南知隨州李道亦棄城去甲辰王瓊討湖賊戰于鼎口不利偽齊陷郢州守臣李簡棄城去統制石世達及杜湛大破湖賊黃誠于龍陽洲十一月己未以右文殿修撰王倫為都督府叅議官癸亥崔增吳全遇湖賊于陽武口死之甲子韓肖胄等使還乙丑禁沿淮諸砦兵擅侵齊境十二月己酉金元帥府遣李永壽王翊來見

四年春正月辛亥朔帝在臨安率百官遙拜二帝乙卯

增淮浙路鹽鈔貼納錢遣章誼等為金國通問使己未  
程昌寓遣杜湛王渥攻楊太皮真砦破之己巳金人攻  
宕昌臨江砦及花石峽庚午詔諸路將師毋以兩國  
通使輒弛邊備乙亥蠲循梅潮惠四州被兵民租戊寅  
金人攻神全砦沿北嶺至大散關己卯韓肖胄罷二月  
癸未席益罷乙酉以徐俯兼叅知政事丙戌禁川陝諸  
將招納北軍湖北叛兵檀成犯長陽縣解潛捕斬之羣  
盜田政自襄陽犯陝州己丑解潛遣統制王恪擊斬之

庚寅金人攻兩當縣辛丑攻仙人關癸卯詔權以射殿  
為景靈宮四時設位朝獻三月辛亥吳玠率楊政吳璘  
等與金烏珠戰于仙人關敗之戊午以趙鼎叅知政事  
壬戌孟庾至行在罷都督府乙丑張浚以資政殿大學  
士罷尋落職奉祠福州居住己巳蠲淮南州縣租一年  
癸酉蠲興元府洋州被兵民稅役二年丙子以王似為  
資政殿學士川陝宣撫使盧法原為端明殿學士與吳  
玠並充副使關師古為熙河蘭廓路安撫制置使夏四

月庚辰朔詔諭川陝官吏兵民以張浚失措當示遠竄  
猶嘉其所用吳玠等能禦大敵止從薄責仍令宣撫司  
講求諮訪凡擾民拂衆之事速釐革之丙戌吳玠復鳳  
秦隴州蜀淮南州軍上供錢一年甲午關師古叛以洮  
岷二州降偽齊丙午徐俯罷是月知壽春府羅興叛降  
偽齊五月庚戌以岳飛兼黃復二州漢陽軍德安府制  
置使甲寅岳飛復郢州斬偽齊守荆超甲子以孟庾兼  
權樞密院事丙寅李成棄襄陽去岳飛復取之金人攻

金州癸酉偽齊收李成餘衆益兵駐新野岳飛與別將王萬夾擊大破之秋七月戊申朔曲赦虔州以吏部尚書胡從年簽書樞密院事庚戌以湖南安撫席益為安撫制置大使建昌軍軍卒修達等作亂殺守臣劉滂江西制置使胡世將遣叅謀侯懋統制邱贊討之壬子命吳玠通信夏國癸丑湖賊楊欽等破社木砦丙辰以吳玠為檢校少師奉寧保靜軍節度使庚申復曲端趙哲官壬戌岳飛遣統制王貴張憲擊敗李成及金兵于鄧州



之西復鄧州丙寅侯慤引兵入建昌軍執修達等斬之  
庚午王貴張憲破偽齊兵復唐州及信陽軍襄漢悉平  
八月庚辰以趙鼎知樞密院事充川陝宣撫處置使湖  
賊夏誠等犯枝江縣解潛擊敗之辛巳吳玠遣統領姚  
仲攻隴城縣克之壬午降王瓊為光州觀察使戊子改  
命趙鼎都督川陝荆襄諸軍事乙未遣魏良臣等充金  
國通問使丙申毀王安石舒王誥己亥周十隆出降復  
叛去犯汀循州壬寅王似罷以岳飛為清遠軍節度使

湖北荆襄潭州制置使九月戊申減淮浙路鹽鈔所增貼納錢壬子夏誠遣將李全功犯公安軍解潛遣統制林閏等擊斬之安定郡王令時薨辛酉合祭天地于明堂大赦蠲襄陽等六郡三年租庚午朱勝非罷金齊合兵自淮陽分道來侵壬申渡淮楚州守臣樊叙棄城去癸酉以趙鼎為尚書右僕射同中書門下平章事兼知樞密院事吏部尚書沈與求叅知政事冬十月丙子朔下詔親征丁丑以孟庾為行宮留守己卯韓世忠自鎮江復

如揚州金人攻滁州以張浚為浙西江東宣撫使金人  
圍亳州席益遣統制吳錫率兵討徭賊楊再興大破之  
壬午偽齊兵犯安豐縣癸未復以張浚為資政殿學士  
提舉萬壽觀兼侍讀甲申復以王瓊為建武軍承宣使  
江西沿江制置使戊子韓世忠邀擊金人于大儀鎮又  
遣將董旼擊之于天長縣鴉口橋己丑金人攻承州又  
圍濠州丙申命後宮自溫州泛海如泉州金人破濠州  
守臣寇宏棄城走戊戌帝御舟發臨安己亥韓世忠捷

奏至壬寅帝次平江加贈陳東歐陽澈祕閣修撰落汪伯彥觀文殿學士黃潛善更不追復乙巳仇愈遣將孫暉擊金人于壽春復霍邱安豐二縣是月借江浙坊場錢一界以備軍費十一月庚戌蠲承楚泰州水砦民兵賦役十年壬子始下詔聲劉豫罪吳玠遣統制楊從儀等擊金人于臘家城癸丑金人入光州甲寅偽齊知光州許約破石額山砦遂據之乙卯韓世忠夜劫金人營于承州金人攻六合縣丙辰掠全椒縣三城湖丁巳以

董敗趙康直總領淮東水砦戊午以胡松年兼權叅知政事金人破滁州劉光世移軍建康韓世忠移軍鎮江張浚移軍常州己未復命張浚知樞密院事以其盡忠竭節詔諭中外癸亥劉光世遣統制王德擊金人于滁州之桑根己巳劉光世遣統制王師晟等襲壽春府執偽齊知府王靖廣賊區稠圍韶州樂昌縣鈐轄韓京擊斬之詔張浚視師江上十二月壬午以樞密都承旨馬擴為江西沿江制置副使丙戌吳倫遣兵攻臘家城破

之丁亥聽兩淮避兵民耕種所在閒田壬辰金齊兵逼廬州岳飛遣統制徐慶牛皋援之劉光世亦遣統制靳賽戰于慎縣張浚遣統制張宗顏擊敗偽齊兵于六合甲午程昌寓遣杜港彭筠合擊楊欽破之己亥以來年正旦日食下詔修闕政求真言庚子金人退師

五年春正月乙巳朔日有食之帝在平江府己酉承州水砦統領仲諒復入楚州庚戌張浚遣統領楊忠閔王進夾擊金人于淮南岸辛亥淮東統制崔德明襲擊手金

兵于盱眙召張浚赴行在己未減淮南諸州雜犯死罪  
以下壬戌以韓世忠為少保淮東宣撫使駐鎮江劉光  
世少保淮西宣撫使駐太平張浚開府儀同三司江東  
宣撫使駐建康甲子酈瓊復光州庚午海賊朱聰犯廣  
州又犯泉州癸酉偽齊將馬泰犯光州是月金主晟殂  
旻之孫亶立二月丙子以岳飛為鎮寧崇信軍節度使  
丁丑帝發平江戊寅遣權太常少卿張鉅奉迎太廟神  
主于溫州壬午帝至臨安丙戌以趙鼎為左僕射張浚

欽定四庫全書

欽定續通志

卷三十四

五十九

右僕射並同中書門下平章事兼知樞密院事都督諸路軍馬岳飛為荆湖南北襄陽府路制置使丁亥吳玠揚政拔秦州己丑詔建太廟壬辰命張浚詣江上措置邊防詔諭諸路宣撫制置司示以專任之旨甲辰蠲湖南路上供三年是月偽齊將商元寇信陽軍守臣舒繼明死之閏月丁未胡松年罷己酉留四川上供銀帛就充軍費乙卯以孟庾沈與求並兼權樞密院事丁巳金薩里罕侵秦州吳玠遣部將牛皓援之遇于瓦五穀戰



死癸亥海賊陳感犯雷州丁卯王瓊罷三月甲戌責授  
濠州團練使己卯以韓世忠兼鎮江府宣撫使劉光世  
兼太平州宣撫使壬午以都督府叅議軍事邵溥兼權  
川陝宣撫副使夏四月壬子封周後柴叔夏為崇義公  
戊午奉安太廟神主己未更免役保正長法甲子太上  
皇帝崩于五國城辛未以諸路稅賦畸零增收錢專充  
上供五月乙亥初謁太廟辛巳遣何鮮等奉使于金通  
問二帝己丑以孟庾知樞密院事戊戌以貴州防禦使

瑗為保慶軍節度使封建國公庚子周十隆降辛丑命  
川陝訪求元祐黨人子孫六月甲辰封武經大夫令  
為安定郡王湖賊楊欽全琮劉詵相繼詣岳飛降癸丑  
以久旱減膳祈禱禁諸路科率岳飛急攻湖賊水砦楊  
太赴水死餘黨劉衡等悉降飛擊夏誠斬之戊午減福  
建貢茶歲額之半丁卯免沿海民前二年逋租秋七月  
壬申以仇愈為沿海制置使甲戌免蘄州上供及租稅  
三年己卯孟庾罷以沈與求兼權樞密院事及措置財

用壬午偽齊兵寇湖陽縣韓世忠復鎮淮軍丙申蠲湖南路上供米三年及秋租之半八月癸丑蠲福建州軍借撥常平錢米己未下詔示章惇蔡卞詆誣宣仁聖烈皇后之罪追貶惇昭化軍節度副使卞單州團練副使子孫不許在朝丙寅以諸盜平減湖廣江西二十二州雜犯死罪以下海賊朱聰降是月偽齊陷光州九月壬午加岳飛檢校少保偽齊寇固始縣統領華旺拒却之尋復光州甲午周十隆復叛犯汀州冬十月乙卯以席

益為四川制置大使李綱為浙西制置大使呂頤浩為  
湖南制置大使澧州賊雷德進降乙丑偽齊寇漣水軍  
韓世忠遣統制呼延通等擊敗之十一月戊寅有事于  
南郊壬午出宮女三千人丙戌命張浚視師荆襄川陝  
十二月己亥以岳飛為荆湖南北襄陽府路蘄黃州招  
討使楊沂中權主管殿前司併統神武中軍  
六年春正月辛未蠲貧民戶帖錢之半無物產者悉除  
之癸酉命給事中中書舍人甄別元祐黨籍丁丑詔凡

入粟補官者毋授親民刑法之職壬午賜宗子伯玖名  
璩為和州防禦使己丑安定郡王令砮薨庚寅還預借  
坊塲錢辛卯詔監司帥臣慢令失職者令張浚黜陟以  
聞甲午振江湖福建浙東饑二月辛亥詔張浚暫赴行  
在奏事甲寅以兵部尚書都督府叅謀折彥質簽書樞  
密院事乙卯韓世忠攻宿遷縣澧州賊伍俊殺雷德進  
以降丙辰韓世忠圍淮陽軍辛酉金烏珠來救世忠引  
兵歸楚州壬戌以折彥質兼權叅知政事癸亥沈與求

罷李綱入見是月張浚至江上會諸將議事命張俊進屯盱眙三月己巳以韓世忠為京東淮東路宣撫處置使岳飛為京西湖北路宣撫副使辛未蠲旱傷州縣民積欠辛巳以樞密副都承旨馬擴為沿海制置副使壬午金齊兵侵漣永軍壬辰寬四川災傷州縣戶帖錢之半夏四月戊戌湖南賊黃旺犯桂陽監甲辰偽齊陷唐州團練判官扈舉臣推官張從之等死之岳飛以母喪去官丙午詔起復劉光世遣副統制王師晟鄺瓊襲偽

齊兵于劉龍城破之甲子以韓世忠為橫海武寧安化  
軍節度使號揚武翊運功臣除商旅緡錢稅丙寅復行  
在官吏奉蠲東京民渡淮南商販之稅五月癸未禁淮  
南州縣收額外雜色租庚寅以劉光世為保靜寧武寧  
國軍節度使壬辰張俊為崇信奉寧軍節度使六月己  
酉求直言辛酉封集英殿修撰令應為安定郡王秋七  
月癸未詔張浚暫赴行在癸巳以郭浩為永興軍路經  
畧安撫使是月劉光世復壽春府八月己亥范宗尹薨

甲辰詔諭將士將親征岳飛遣統制牛皋破偽齊鎮汝  
軍禽其守薛亨乙巳命權殿前司解潛等帥精兵扈從  
主管步軍司邊順留兵守臨安知臨安府梁汝嘉為巡  
幸隨軍都轉運使丁未以秦檜為醴泉觀使兼侍讀行  
宮留守孟庾提舉萬壽觀兼侍讀同留守戊申岳飛遣  
將楊再興復西京長水縣己酉命秦檜孟庾權叅決尚  
書省樞密院事庚戌蜀虔州殘破諸縣逋負梅州夏秋  
兩稅辛亥奉神主發臨安己未預借江浙民來年夏稅



純帛折米輸官是月岳飛克蔡州九月丙寅帝發臨安岳飛遣統制王貴郝晟董先復虢州盧氏縣癸酉帝次平江癸未權奉安神主于平江能仁寺劉豫告急于金金主不許豫命其子麟姪猊分道入寇冬十月丁酉劉麟寇淮西張浚遣楊沂中張宗顏等分兵禦之沂中遣統制王德郾瓊及賊將崔皋賈澤王遇戰皆敗之賊兵攻壽春府芍陂砦守臣孫暉拒戰又敗之壬寅以梁汝嘉兼浙西淮東沿海制置使前護副軍都統制王彥副之

甲辰劉猷犯定遠縣沂中進戰大敗之麟拔砦去孔彥  
舟亦解光州圍癸丑張俊楊沂中引兵攻壽春府不克  
十二月甲午降廬光濠等州死罪以下召秦檜赴行在  
戊戌韓世忠攻淮陽軍壬寅趙鼎罷丙午折彥質罷丁  
未加張俊少保改鎮洮崇信奉寧軍節度使楊沂中保  
成軍節度使殿前都虞候戊申命秦檜赴講筵供職孟  
庾為行宮留守辛亥以資政殿學士張守叅知政事兼  
權樞密院事丙辰以呂頤浩為浙西安撫制置大使判

臨安府丁巳以劉光世為護國鎮安保靜軍節度使

七年春正月癸亥朔帝在平江下詔移蹕建康蠲無為  
軍稅役一年丁卯張浚遷特進己巳發米濟京東陝西  
來歸之民張浚入見丁丑解潛罷以劉錡權主管馬軍  
司并殿前步軍司公事癸未以翰林學士陳與義叅知  
政事資政殿學士沈與求同知樞密院事乙酉以張浚  
兼樞密使丙戌西蕃三十八族首領趙繼忠等來歸丁  
亥以秦檜為樞密使何鮮范寧之至自金始聞上皇及

寧德皇后崩問已丑帝成服二月癸巳朔日有食之百  
官七上表請遵以日易月之制詔外朝勉從所請宮中  
仍行三年之喪庚子遣王倫等使金奉迎梓宮辛丑以  
日食求直言以久旱命諸州慮囚丁巳以岳飛為太尉  
湖北京西宣撫使己未帝發平江三月己丑蠲駐蹕及  
經從州縣積年逋賦丁卯以吏部侍郎呂祉為兵部尚  
書都督府叅謀軍事辛未帝至建康壬申詔尚書省常  
程事從叅知政事分治癸酉減建康流罪以下蠲建康

府太平寧州逋賦及下戶今年身丁錢戊寅進沈與求  
知樞密院事己卯尊宣和皇后為皇太后庚辰以呂頤  
浩為少保兼行宮留守孟庾罷甲申以劉光世為少師  
萬壽觀使夏四月癸巳築太廟于建康以臨安府太廟  
為聖祖殿丁未岳飛乞解官持餘服遂棄軍去詔不許  
庚戌以兵部侍郎兼都督府叅議軍事張宗元權湖北  
京西宣撫判官監其軍五月癸未以鄺瓊為行營左護  
軍副都統制丙戌偽齊陷隨州六月乙巳沈與求薨秋

七月甲戌嗣濮王仲湜薨癸未以久旱命中外臣庶實封言事甲申蠲諸路民積年逋租乙酉詔即建康權正社稷之位己丑詔諸路歸業民墾田及八年始輸全稅八月乙未以張俊為淮西宣撫使楊沂中為淮西制置使主管侍衛馬軍司劉錡副之命鄭瓊率兵赴行在戊戌瓊殺中軍統制張景等執呂祉及趙康直趙不羣以叛奔劉豫壬寅鄭瓊引兵至淮殺祉及康直釋不羣使還命張宗元往招之甲辰以趙鼎為萬壽觀使兼侍讀

九月壬申張浚罷甲戌落張浚觀文殿大學士仍領宮  
祠丙子復以趙鼎為尚書右僕射同中書門下平章事  
兼樞密使戊寅蠲廬州壽春府民租一年己卯朝獻聖  
祖于常朝殿庚辰朝饗太廟辛巳合祭天地于明堂大  
赦戊子禁諸路進羨餘以劉錡知廬州兼淮西制置副  
使冬十月丁酉敕張浚安置嶺表戊戌改永州居住偽  
齊犯泗州守臣劉綱擊走之壬子統制呼延通王權等  
襲擊金人于淮陽軍閏月乙丑蠲江東路月椿錢振京

西湖北饑民庚辰韓世忠引兵渡淮逆擊金人于劉冷  
莊辛巳李綱罷癸未復漢陽軍是月張俊棄盱眙十一  
月丁酉以知温州李光為江西安撫制置大使丁未金  
帥達蘭烏珠入汴京執偽齊劉豫廢為蜀王癸丑詔來  
春復幸浙西是月偽齊知臨汝軍崔虎詣岳飛降十二  
月丁卯祔徽宗皇帝顯肅皇后神主于太廟庚午以解  
潛權主管馬步軍司命韓世忠屯楚州癸未王倫等使  
還入見言金人許還梓宮及皇太后又許還河南諸州



丁亥復遣王倫等奉迎梓宮是冬吳玠遣裨將馬希仲  
攻熙州鄭宗李進攻鞏州不克



欽定續通志卷三十四